



# Gutpela Wasman

No 4/2011

Jisas Kraus i tok,  
"Mi gutpela wasman  
bilong sipsip."

Jon 10.11

## WOK MISIN - GO



*Pedro - Liklik misinari boi  
( Hap 1)*

Long kantri Teki i gat wanpela boi i stap, nem bilong em Pedro. Em i gat tenpela krismas. Em i stap wantaim mama na papa, tupela i wok olsem misinari long dispela kantri. Ol i bin wok misin long dispela kantri planti yia. Haus bilong ol i stap arere long solwara na ol bot bilong kisim pis i save kam sua long dispela hap. Long wanpela taim wanpela

yangpela misinari man i kam stap sotpela taim wantaim ol. Em i bin wok misin long kantri Afrika. Nau em i taim bilong em long go bek long asples bilong em olsem na em i kam stap wantaim famili bilong Pedro.

Pedro i laikim dispela yangpela man na tupela yet i raun long ol plaua gaden o long ol gutpela gras arere long haus. Dispela yangpela misinari i save stori long wanem wok em i bin mekim long Afrika. Em i save wok planti wantaim ol liklik pikinini. Em i save soim ol piksa stori buk bilong Jisas na stori long ol. Sampela taim em i soim ol bikipela piksa (chart) na stori long ol. Ol i save laikim tru na ol i save sindaun gut na harim gut ol stori em i mekim. Na em i tokim Pedro olsem, "Sori tru, ol dispela

*pikinini i no save long Jisas em i husat na i gat bikpela nid long tokim ol long Jisas, na wanem wok em i mekim long*



*helpim yumi olgeta manmeri long graun. Tok bilong Jon 3.16 i no kamap klia long ol yet. Ol i mas save long dai na kirap bek bilong Jisas.” Pedro i harim na em i askim gen, “Nau bai yu go long asples bilong yu na bai yu kam i go bek na wok wantaim ol gen o nogat?” Misinari i bekim, “Em mi no klia yet. Sapos God i laik na rot i op gen long mi go em bai mi amamas long lukim ol, tasol rot i no op em bai mi stap bek.”*

Yangpela misinari i lukim olsem bel bilong Pedro i sori tru long ol dispela pikinini long Afrika. Em i stap sotpela taim na i lusim Pedro na famili na i go long kantri bilong en. Pedro i stap em yet long haus na stori bilong dispela yangpela misinari i wok strong wan wan de taim em yet i stap insait long rum bilong em. Na wanpela taim, mama i redim kaikai samting long ples bilong redim kaikai (kitchen) na

liklik Pedro i wokabaut isi isi i kam long mama. Em i sanap long dua longwe liklik tasol na em i no mekim wanpela tok. Bel bilong em i hevi liklik long toktok. Mama i lukim na i save Pedro i gat sampela tok olsem na em i askim em, “Pedro, yu luk wari liklik. Yu gat sampela tok, a?” Pedro i go klostu long mama na i tok, “Yes mama, mi gat wanpela tok. Dispela yangpela misinari long Afrika i bin kam stap wantaim mipela em i bin stori long mi long ol pikinini long Afrika. Ol i no save long nem bilong Jisas olsem na mi laik go tokim ol long Jisas.”

Mama i harim na em i kirap nogut na i lukim Pedro na i tok, “Sori pikinini bilong mi, nau yet em yu no stap long mak bilong go aut. Mi sori olsem mi bai tok nogat.”

Nek bilong Pedro i senis olgeta, aiwara i stat long kam daun long ai yet na em i tok, “Mama, mi laik go plis, mama, plis? Afrika misinari i tok em i save soim ol stori buk bilong Jisas na ol bikpela piksa na autim stori long ol. Mama, mi bai mekim wankain ya.” Na liklik Pedro i krai moa yet. Mama i holim pas long bros bilong em na tupela i krai wantaim na mama i tok, “Yu gat hangre bilong wok misin, God i lukim pinis. Yu bai mekim wok misin yet tasol pastaim yu mas pinisim skul na go long ol bikpela skul o ol kolis, orait bai yu redi long mekim dispela wok. Nau yet em mi sori tru bai yu no inap go.” Tupela i holim pas na krai inap sampela taim na bihain Pedro i go



insait long rum bilong em.

Em i sindaun na i lukluk i go ausait na i lukim wanpela man i save stap klostu long ol i pul long bot bilong em na i kam sua arere. Em i ran i go na i laik helpim em. Man i amamas long lukim em. Man i taitim bot long wanpela as bilong wanpela diwai yet na Pedro i askim, *"Yu go raun long wanem hap na yu kam?"* Man i bekim, *"Mi go raun painim pis long insait long biksi."* "Long hap long biksi yu lukim ples bilong ol blakskin pikinini tu o nogat?" Pedro i askim gen. *"O yes, mi save harim ol i stap tasol em i stap longwe tru. Mi no go long dispela hap na mi no laik tu long go. Mi raun klostu na painim pis na salim kisim moni na stap laip, em inap long mi."*

Orait tupela i bringim ol samting i kam long haus bilong dispela man bilong painim pis. Pedro i lusim em pinis na em i hariap i go bek long haus. Em i apinun olsem faiv o siks kilok na liklik boi i go stret long rum. Em i rausim ol Baibel stori buk, ol piksa na ol bikpela piksa stori na pulimapim insait long bek bilong em. Em i kisim na i go ausait. Mama

i no lukim em na i no save em i stap we tu. Liklik Pedro i go hariap long arere long solwara we dispela man em i helpim i bin pasim bot. Em i putim bek i go insait long bot na rausim rop man i bin pasim. Em i kalap antap na em i no pul. Nogat. Em i larim strong bilong wara i pulim em i go. Muv (wave) bilong si i no strong tumas. Olsem na isi isi tasol em i kisim Pedro i go i go insait tru long dip si. Em i lukluk i kam bek na i lukim ples bilong em i olsem wanpela liklik ailan i stap longwe tru. Tudak i karamapim ples na bel bilong em i krai long kaikai nau. Em i sindaun long bot na i pasim ai na i prea sotpela tru olsem, *"Papa God, bel bilong mi i hangre tasol nau yet mi nogat kaikai long givim em. Strongim mi inap tumora bai em i ken kisim kaikai. Lukautim mi tu long trip bilong mi. Amen."*

*Bot i kisim Pedro i go we? Wanem samting bai i kamap long em? Painim aut long Hap 2.*

## Memori ves na Pasel taim

Yu kisim Baibel bilong yu na painim ol tok i lus na raitim i go insait. Yu ken lainim dispela Baibel ves olsem memori ves bilong yu na bai yu ken i gat hangre long mekim wok bilong God olsem liklik Pedro.


Na em i tokim ol olsem,

"Yupelai \_\_\_\_\_ i go long \_\_\_\_\_ hap  
bilong \_\_\_\_\_ na autim \_\_\_\_\_  
long olgeta \_\_\_\_\_.

Mak 16.15



Stori i kam long "Mission Voice of Hope Magazine"  
John Bonsco i tanim i go long tok pisin.



Published and printed by:  
Publications Department  
Evangelical Brotherhood Church (Inc.)  
P.O. Box 996, Lae 411, Papua New Guinea

July/August 2011